

Date – 03/03/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Mizote Kut pui ber leh hlut ber, Chapchar Kut lawmna chu vawiin atang hian tan a ni.**
- 2. Assembly budget session vawiina chhonzawm turah bill thar sawi ho a ni dawn.**
- 3. Vice President Jagdeep Dhankar chuan ngaihtuahna thar leh zirbingna chu ram hmasawna atan an pawimawh thu a sawi.**
- 4. Ni thum chung chhanchhuah hna thawh anih hnuah Uttarakhanda vur tawlh avanga chhiatna thlengah mi 8 an thi tih finfiah a ni.**

<><><>

CCK

Mizote Kut pui ber leh hlut ber, Chapchar Kut lawmna chu vawiin atang hian tan a ni a,

Tukin khan Chapchar Kut puala intlansiak buatsaih a ni a, Central YMA leh Art & Culture Dept in buatsaihin, Aizawla Chanmari leh Sikulpuikawn atangin Lammual panin tlan a ni.

Chapchar Kut lawmna pui ber hi Aizawl Sipai Lammualah ni 7 khian neih a ni dawn a, tunkar chung hian a lawmna kawng hrang hrangin neih chhoh a ni dawn a, Pangpar entirna, hnam thil dehchhuah phochhuahna hun te leh pipui sulhnu tlawh theihna hmun te siam a ni.

<><><>

ASSEMBLY SESSION

Assembly budget session vawiina chhonzawm turah LESDE minister Pu Lalnghinglova Hmar-in bill thar hlak 2 a putluh leh chief minister Pu Lalduhoma'n dan dinglai siamthatna tur a putluh sawi ho a ni dawn.

Assembly inkhawm kal mek chu Finance Commission 16-na lo zin avanga chawlhkar khat chawlh a nih hnu-ah vawiin hian chhonzawm leh a ni dawn a. Vawiinah hian chief minister Pu Lalduhoma, finance changtu ni baw, chuan “The Mizoram Goods and Services Tax (First Amendment) Bill, 2025” dan siamthatna tur chu a pulut ang a. Labour, Employment, Skill Development & Entrepreneurship (LESDE) minister Pu Lalnghinglova'n “The Mizoram Youth Commission Bill, 2025” a pulut anga, hei bakah hian amah vek hian “The Mizoram Private Placement Agencies (Regulation) Bill, 2025” chu pulutin

heng dan thar siam tura duan 2 leh dan ding lai pakhat siamthatna tur bill-te hi sawi hova pawm tum a ni ang.

Vawiinah hian dar 10 leh a chanve atanga assembly inkhawm hi tanin zawhna leh chhanna hun hman a ni ang a. Zawhna leh chhanna hun hman zawh hian Minister Dr. Vanlalhlana chuan “Mizoram State Higher Education Council Rules, 2024.” chu house dawhkanah a dah ang a. Minister Pi Lalrinpuui'n “Annual Report of the Office of the State Commissioner for Persons with Disabilities, Mizoram for the year 2022-2023 and 2023-2024” bakah “The Annual Reports of Mizoram State Commission for Protection of Child Rights (MSCPCR) for the year 2023-2024” chu house dawhkanah a dah leh ang a. Hemi hnu hian speaker Pu Lalbiakzama'n business advisory committee (BAC) in tun tum assembly inkhawm hun hman dan tur a lo duan lawk chu a pharh ang.

Assembly secretariat atanga thu dawn danin dan siam tur leh dan dinglai siamthat tur lut hi a vaiin 9 a tling tawh a. Sorkar dan siam tur chhawpchhuahte hi naktuk leh March ni 6 (Ningani) te khian putluh a sawiho a ni dawn niin business advisory committee (BAC)-in assembly inkhawm hun hman dan tur a duan lawk atang chuan a lang a ni.

March ni 20 thleng awh tur assembly inkhawmah hian tun thlengin House chhunga chhan chi zawhna 918 a lut tawh a, ziaka chhan chi zawhna 105 a lut tawh bawk a. House dawhkana dah tur lehkha pawimawh 8 a lut tawh a, official resolution 1 a a lut tawh bawk.

<><><>

STATE UNIVERSITY

Higher & technical education minister Dr. Vanlalhlana hova MLA thenkhat leh department hotute thutkhawmna-ah Mizoramin state university a neih ngei a ngaih tawh thu tarlan a ni.

Minister hova thutkhawmna-ah hian National Education Policy (NEP) 2020-in a phut angin Mizoram University ang central university-te chu 2035 atangin research-intensive university a nih a tul tawh dawn a. Central university-ten degree an pek tawh dawn loh avangin state university-te'n degree an pek a ngai tawh dawn a, chumi tur chuan Mizoramin State University a neih ngei a ngaih tawh thu sawi lan a ni a. State university nei tur hian sum tam tak sen belh a tul dawn a. Mizoram Sawrkar sum dinhmun a that tawh loh avangin State dangte tihdan pawh a hmuna tlawha zir chian a ni a. State University hi campus zau tak nei a din chu duhthusam a nih rualin, Mizoram Sawrkar sum dinhmun thlirin chu chu kalpui theih dawn loha ngaih a ni a. Chuvang chuan, State thenkhatte'n State University an kalpui dan angin college neih sa te hmang tangkaiin Mizoram state university din chu 'clustered university' kal phunga din turin Mizoram Sawrkar chuan hma a la ta a. NEP 2020 duh dan angin State University chu multidisciplinary-a kal a ngaih avangin college eng emaw zah chu sawikhawm (cluster) tum niin, resource neih sa inhman tam theih chu inhman tam tura ruahmanna siam a ni.

Hemi mil hian Mizoram State University Bill, 2025 chu Assembly Session kal lai mekah hian theh luh a nih thu inhrilh fiah a ni a. Champhai leh Lunglei

district a tlawmngai pawl intelkhawmte'n an district a state university din tura an dilna chungchang pawh sawiho tel a ni a. District pahnihin an dilna hi tih awm tak ni a ngaiin a hrethiam hle a. Chutih laiin, Mizoram sorkarin state university din tura hma a lo lak tawh dan leh din ngei ngei a ngaih dante inhrilhfiah a ni a. Khawi district zawkah nge din a nih ang tih chu sorkar thuchhuah chuan a tarlang lo.

Sawihona-ah hian health minister leh Lunglei East bialtu MLA Pi Lalrinpuui te, Lunglei North bialtu Pu V. Malsawmtluanga, Lunglei South bialtu Pu Lalramliana Papua, leh Champhai North bialtu Pu Ginzalala te bakah Higher & Technical Education Department officer-te an tel a ni.

<><><>

WINE, BEER

Sorkar chuan zu khapna dan siam danglam hret a, Mizoram thei leh thlai thar chhuah hmanga wine leh beer siam phalna ruahman a tum.

Akashvani Aizawl-in thu a dawn danin Mizorama zu khapna dan hman mek, Mizoram Liquor (Prohibition) Act, 2019 chu hemi lam hawi hian siamthat turin he dan siamthatna atan hian assembly secretariat-ah amendment bill thehlut a ni tawh a. March ni 6 khian he dan siamthat tura rawtna hi excise & narcotics minister Pu Lalnghinglova Hmar chuan a pulut dawn ni a thu dawn a ni. Chief minister Pu Lalduhoma chuan February ni 21 khan zu khapna dan hlip turin sorkarin hma a lak loh thu leh sawihona pawh a la awm loh thu assembly house-ah a sawi a. Wine leh beer chungchangah zu khapna dan MLP Act siamthatna tur excise & narcotics minister-in a ruahman thu a sawi. Hemi chungchanga excise & narcotics department lam atanga thu dawn danin Mizorama thei, buh leh bal leh thlai thar chhuah atanga wine leh beer siamchhuah a nih theihna atan dan dinglai hi siamthat a her rem tum a ni.

Mizoram thar chhuahah hian grape chauh ni lo, balhla, lakhuihthei, sawhthing, dragon fruit, sapthei, Zobuh leh thil dang wine leh beer siam theihna ang chi atanga siam phalna atan dan hi siam that tum a ni a. Mizoram thar atang chauhva siam theih tura ruahman a ni a. Hei hian Mizoram pawna wine leh beer siam lakluh phalna a huam dawn lo a ni. Hetih lai hian horticulture minister Prof. Lalnilawma chuan Mizoram thei, buh leh bal leh thlai thar atanga ramdanga hralh chhuah (export) tlak tur wine siam chhuak tura ruahmanna an kalpui thu Zirtawpni khan a lo sawi tawh bawk a ni.

<><><>

MIZORAM-ASSAM TALKS

Ramri buai chungchanga Mizoram leh Assam sorkar official-te March thla tawp lama inbe turin ruahmanna an siam chu Mizoram lamin an la chhang lo.

Home department hotute'n Akashvani Aizawl a hrilh danin official-te rawtna hi ngaihtuah a ni a. March thla chawhnu lama state pahnih official-te inbe tura rawtna hi a taka chantir theih a ni dawn em tihah thutlukna an la siam lo ni-in an sawi a. Assembly inkhawm kal lai mek hi March ni 20 a tawp chauh tur a nih avangin hun a awm thei ang em tih an ngaihtuah mek thu an sawi a ni. Nikum August ni 9 a Aizawl a home minister Pu K. Sapdanga ho Mizoram aiawhte leh Assam border protection & development minister Pu Atul Bora kaihhruai Assam sorkar aiawhte inbiak tuma March ni 31, 2025 hma

ngeiin Guwahati ah minister pahnihte'n inbiakna chhunzawm se ti a thu an dah chu tihpuitlin theih a ni dawn ta lo ni-in a lang a. Chuti chung chuan minister pahnihte inbiak hma hian official-te inbiak phawt hi Mizoram sorkar chuan a rawt a. March thla chung hian official-te tal hi chu an inbe hman ang em tih a Chiang thuai tura ngaih a ni.

Mizoram sorkar hian minister level-a inbiak hma hian an inbiakna tur atana kawng lo sial lawk a, ram inchuh chungchang hi state pahnih official-te'n chipchiar taka lo sawiho phawt ni se tih an rawt reng a. Assam sorkar lamin chhanna an rawn pek mai loh avangin inbiak hun a khawtlai ta niin home department hotute chuan an sawi a ni. Inbiakna hmasa berah Assam sorkar chuan Pu Atul Bora leh official dangte rawn tirin khatih lai a home minister Pu Lalchamlia kaihhruai Mizoram aiawhte nen August 2021 khan Aizawl-ah ramri chungchang inbiakna hmasa ber buatsaih a ni a. Hemi hnu hian sorkar hmasa hun lai khan Aizawl leh Guwahati-ah minister-te hi vawi khat ve ve inbe zui-in ZPM sorkar a lo pian hnu-ah nikum August thla khan Aizawlah minister 2-te an inbe leh a ni. CM hlui Pu Zoramthanga leh Assam CM Pu Himanta Biswa Sarma te pawh Delhi-ah vawi 2 an inbe tawh bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

VICE PRESIDENT

Vice President Jagdeep Dhankar chuan ngaihtuahna thar leh zirbingna chu ram hmasawinna atan an pawimawh thu a sawi. Indian Institute of Technology-Hyderabad (IIT-Hyderabad) zirlaite nen an inkawmhonaah he thu hi sawiin Vice President chuan khawvela Sciend and Technology lama hmahruaitu ni turin ngaihtuahna thar hman thiam a pawimawh a ti a. Sumdawng liante pawhin helamah hian an sum tamzawk an dah a pawimawh thu a sawi bawk a ni.

<><><>

UTTARAKHAND

Ni thum chung chhanchhuah hna thawh anih hnuah Uttarakhanda vur tawlh avanga chhiatna thlengah mi 8 an thi a,mi 46 chu dam taka chhanchhuah an ni. Vanduaina thlenna hmun hi Chamoli district-a Mana khuaah a ni a. Kawng siam hna thawk mi 54 chu vur tawlh hian a chhilh a ni. Chief Minister Pushkar Singh Dhami chuan chhanchhuah hna khirhkhan tak chu zawh fel a ni tawh a ni.

<><><>

SEBI

Mumbai Anti Corruption court chuan Securities and Exchange Board of India (SEBI) hotute lakah thubuai a ziaklut. Thubuai ziahluh zingah hian SEBI Chairperson hlui Madhabi Puri Bch pawh telin stock market-a inbumna leh

inkaihhruaina bawhchhiaa puh an ni a. SEBI-a in bumna chhui turi hian Special Judge SE Bangar chuan chanchinbumi Sapan Shrivastava'n hekna a thehluh avanga chhui turin thupek a chhuah a. Court chuan he thubuai chhui dan hi uluk taka a vil reng tur thu a sawi bawk a ni.